



## O‘ZBEKISTON RESPUBLIKASI “O‘ZARXIV” AGENTLIGINING BUYRUG‘I

### Ўзбекистон Республикаси “Ўзархив” агентлиги хузуридаги архив иши масалалари бўйича Жамоатчилик кенгашининг 2021 йил 15 апрелдаги 1-сон баёни ижроси ҳақида

“Ўзархив” агентлигининг жамоатчилик билан алоқаларни янада мустаҳкамлаш ва соҳада жамоатчилик назоратини кучайтиришга қаратилган фаолиятини ташкил этиш ҳамда 2021 йил 15 апрелдаги 01-13/1-сон билан рўйхатга олинган Агентликнинг Жамоатчилик кенгаши 1-сон таъсис йиғилиши баённомаси ижросини таъминлаш мақсадида, **буюраман:**

1. 2021 йил 15 апрелдаги “Ўзархив” агентлиги хузуридаги архив иши масалалари бўйича Жамоатчилик кенгаши 1-сон йиғилиш баёни билан Жамоатчилик кенгаши ва Кенгаш низоми **маъқулланганлиги маълумот ва ижро учун** қабул қилинсин.

2. “Ўзархив” агентлиги хузуридаги архив иши масалалари бўйича Жамоатчилик кенгаши (кейинги ўринларда - Жамоатчилик кенгаши) таркиби 1-иловага мувофиқ тасдиқлансин.

3. Жамоатчилик кенгаши низоми 2-иловага мувофиқ тасдиқлансин.

4. Жамоатчилик кенгашига:

Кенгаш фаолиятини йўлга қўйишда архив иши қонунчилигига, жамоатчилик назорати тўғрисидаги қонунчиликка риоя этилишини таъминлаш;  
соҳага оид норматив-ҳуқуқий ҳужжатлар лойиҳаларини муҳокамадан ўтказиб бориш;

Ҳайъат қарорлари устидан жамоатчилик назоратини олиб бориш;  
ҳар олти ойда Жамоатчилик кенгаши йиғилишларида ҳудудий бошқармалар, миллий ва давлат архивлари фаолияти юзасидан ахборотини эшитиб бориш тавсия этилсин.

5. Агентлик директорининг маънавий-маърифий ишлар ҳамда давлат тили масалалари маслаҳатчиси Ш. Турсунбаевга:

Агентлик билан Жамоатчилик кенгашининг ҳамкорлигини таъминлаш;

Жамоатчилик кенгашини архив иши ва иш юритиш соҳасидаги норматив-ҳуқуқий база билан таништириб бориш;

Жамоатчилик кенгашининг низомида белгиланган вазифаларни амалга ошириш юзасидан Кенгаш аъзоларига кўмаклашиш вазифалари юклатилсин.

6. Ушбу буйруқнинг ижро этилиши юзасидан назорат қилиш Агентлик директорининг маънавий-маърифий ишлар ҳамда давлат тили масалалари маслаҳатчиси Ш. Турсунбаев зиммасига юклансин.

Директор



У. Юсупов

**“Ўзархив” агентлиги хузуридаги архив иши масалалари бўйича  
Жамоатчилик кенгаши  
ТАРКИБИ**

<b>№</b>	<b>Ф.И.Ш.</b>	<b>Лавозими</b>	<b>Кенгашдаги лавозими</b>
1.	Азамат Зиё	Фанлар академияси Тарих институти директори, тарих фанлари доктори, профессор	Жамоатчилик кенгаши раиси
2.	Шухрат Мирайимович Турсунбоев	“Ўзархив” агентлиги директорининг давлат тили бўйича маслаҳатчиси	Жамоатчилик кенгаши раиси ўринбосари-Кенгаш котиби
3.	Анваржон Орифжонович Алиев	“Ўзархив” агентлиги директорининг ахборот сиёсати масалалари бўйича маслаҳатчиси	Жамоатчилик кенгаши Ишчи органи раҳбари
<b>Кенаш аъзолари, Ишчи органи</b>			
4.	Абдурасул Махмудович Яхшибоев	Ўзбекистон Миллий архиви бўлим мудири	Кенгаш аъзоси
5.	Анваржон Акрамжонович Абдумухторов	Ўзбекистон давлат муассасалари ва жамоат хизмати ходимлари касаба уюшмаси Республика кенгаши раиси	Кенгаш аъзоси
6.	Зулайхо Абдураззаковна Акрамова	Қонунчилик палатаси депутати	Кенгаш аъзоси
7.	Акмал Жумакул ўғли Амиров	Ташқи ишлар вазирлиги архив мудири	Кенгаш аъзоси
8.	Муаззамхон Хурсановна Умарова	Маҳалла ва оилани қўллаб-қувватлаш вазирлиги бош мутахассиси	Кенгаш аъзоси
9.	Нодира Баҳодиржановна Каримова	Ўзбекистон касаба уюшмалари федерацияси девони бўлим мудири	Кенгаш аъзоси
10.	Лола Шавкатовна Арифжанова	Вазирлар Маҳкамаси идоравий архиви мудири	Кенгаш аъзоси
11.	Зумрад Байхуразовна Раҳманкулова	Ўзбекистон Миллий университети доценти, тарих фанлари номзоди	Кенгаш аъзоси
12.	Озода Раҳматжоновна Жаҳонова	Ўзбекистон Қизил ярим ой жамияти кадрлар бошқармаси инспектори	Кенгаш аъзоси
13.	Умида Алимджановна Тешабаева	А.Навоий номидаги Ўзбекистон Миллий кутубхонаси директори	Кенгаш аъзоси
14.	Улбосин Абдухатовна Абдумаликова	“Ижтимоий фикр” жамоатчилик фикрини ўрганиш маркази директори маслаҳатчиси	Кенгаш аъзоси
15.	Гулнора Адашевна Тўраева	Ўзбекистон Республикаси ИИВ ахборот маркази махсус фондлар бўлими бошлиғи	Кенгаш аъзоси

16.	Наргис Қосимова	Журналист, блогер	Кенгаш аъзоси
17.	Шавкат Туробович Рахматуллаев	“Тарихчилар жамияти” нодавлат нотижорат ташкилоти рахбарининг ўринбосари	Кенгаш аъзоси
18.	Мақаддас Дўстматов	Халқаро “Олтин мерос” хайрия жамоат фонди ижрочи директори	Кенгаш аъзоси
19.	Даврон Фатхуллаевич Файзуллаев	“Шаҳидлар хотираси” жамоат фонди вакили-Қатағон қурбонлари музейи архив ва фонд бўлими бошлиғи	Кенгаш аъзоси
20.	Нодира Махмудовна Мусаева	Ўзбекистон Фахрийларининг ижтимоий фаолиятини қўллаб- қувватлаш жамоат бирлашмаси шаклидаги “Нуроний” жамғармаси бўлим бошлиғи	Кенгаш аъзоси
21.	Мухайё Сирожиддановна Исакова	Ўзбекистон Фанлар академияси Тарих институти Бош илмий ходими, Ўзбекистон Миллий архиви катта илмий ходими	Кенгаш аъзоси

**Ўзбекистон Республикаси “Ўзархив” агентлиги ҳузуридаги  
Жамоатчилик кенгаши тўғрисидаги  
НИЗОМ**

**1-боб. Умумий қоидалар**

1. Жамоатчилик кенгаши Низоми (кейинги ўринларда Низом деб юритилади) “Ўзархив” агентлиги ҳузурида жамоатчилик асосида ўзининг асосий вазифалари, функциялари, ваколатларини ва фаолиятини ташкил этиш тартибини белгилайди.

2. Жамоатчилик кенгаши ўз ишини жамоатчилик асосида олиб борадиган, доимий фаолият юритувчи маслаҳат-кенгаш органи ҳисобланади.

3. Жамоатчилик кенгаши “Ўзархив” агентлигининг марказий аппарати ҳузурида ташкил этилади ва унинг фаолияти барча ҳудудий бошқармалари ҳамда тасарруфидаги ташкилотларига татбиқ этилади.

4. Жамоатчилик кенгаши “Ўзархив” агентлиги раҳбарининг буйруғи (қарори) билан ташкил этилади.

5. Жамоатчилик кенгашининг қарорлари тавсиявий хусусиятга эга.

Жамоатчилик кенгашининг қарорини “Ўзархив” агентлиги директори томонидан тасдиқланишига қўл қўйилади. Жамоатчилик кенгаши қарорига мувофиқ Агентликнинг буйруғи, фармойиши қабул қилиниши мумкин.

6. Жамоатчилик кенгаши ўз фаолиятида Ўзбекистон Республикасининг Конституцияси ва қонунларига, Ўзбекистон Республикаси Олий Мажлиси палаталарининг қарорларига, Ўзбекистон Республикаси Президентининг фармонлари, қарорлари ва фармойишларига, Ўзбекистон Республикаси Вазирлар Маҳкамасининг қарорлари ва фармойишларига, мазкур Низомга ҳамда бошқа қонун ҳужжатларига амал қилади.

7. Жамоатчилик кенгаши тўғрисидаги низом ва унга киритиладиган ўзгартишлар ҳамда қўшимчалар Кенгаш маъқуллаганидан сўнг “Ўзархив” агентлиги раҳбарининг буйруғи (қарори) билан тасдиқланади.

**2-боб. Жамоатчилик кенгашининг асосий вазифалари, функциялари,  
ҳуқуқлари ва мажбуриятлари**

8. Қуйидагилар жамоатчилик кенгашининг асосий вазифалари ҳисобланади:

қабул қилинаётган норматив-ҳуқуқий ҳужжатларда, қарорларда, шунингдек, давлат, тармоқ ва ҳудудий ривожлантириш дастурларида жамоатчилик манфаатлари ва жамоатчилик фикри ҳисобга олиниши, фуқароларнинг, юридик шахсларнинг ҳуқуқлари ва қонуний манфаатларини, жамият манфаатларини ҳимоя қилиш соҳасида қонун ҳужжатлари талаблари ижросини таъминлаш, давлат органи зиммасига юкланган ҳамда ижтимоий ва жамоатчилик манфаатларига дахл қилувчи вазифалар ва функцияларни бажариш, давлат хизматларини кўрсатиш, ижтимоий шериклик доирасида амалга ошириладиган битимлар, шартномалар, лойиҳалар ва дастурларни рўёбга чиқариш бўйича давлат органи ва унинг мансабдор шахсларининг фаолияти устидан жамоатчилик назоратини амалга ошириш;

биргаликда мулоқот қилиш, “Ўзархив” агентлигининг нодавлат нотижорат ташкилотлари, оммавий ахборот воситалари ва фуқаролик жамиятининг бошқа институтлари билан самарали ҳамкорлигини таъминлаш учун “Ўзархив” агентлигини ва ҳудудий бошқармаларини фуқаролар билан боғлаб турадиган “кўприк” ролини бажариш;

“Ўзархив” агентлигига нодавлат нотижорат ташкилотлари ва фуқаролик жамиятининг бошқа институтларидан келиб тушган социал ва ижтимоий аҳамиятга молик лойиҳаларни умумлаштириш ва баҳолаш;

Архив ходимларининг ҳуқуқлари, эркинликлари ва қонуний манфаатларига дахл қилувчи энг муҳим масалалар юзасидан давлат органининг фаолияти ҳақидаги жамоатчилик фикрини тизимли мониторинг қилиш ва ҳар томонлама таҳлил қилиш, социологик сўровлар ўтказиш, жумладан уларни ахборот-коммуникация технологияларидан фойдаланган ҳолда ўтказиш;

“Ўзархив” агентлиги фаолиятида коррупцияга қарши курашиш соҳасидаги давлат дастурлари ва бошқа дастурларни ишлаб чиқиш ҳамда амалга оширишда иштирок этиш, коррупцияга қарши курашиш бўйича олиб борилган ишлар устидан мониторинг ва таҳлил ўтказиш, шунингдек, уларнинг натижалари бўйича таклифлар тайёрлаш;

давлат органи фаолиятининг очиклигини таъминлаш бўйича амалга оширилаётган тадбирларни мониторинг қилиш, унинг фаолияти тўғрисида батафсил ахборот олиш имкониятларини таҳлил қилиш, уларни янада кенгайтириш бўйича таклифлар ишлаб чиқиш;

архив иши ва иш юритиш соҳасини ислоҳ қилишда фуқаролар иштирок этиши учун яратилган шарт-шароитларни ўрганиш ва уларни яхшилаш бўйича таклифлар ишлаб чиқиш;

архив иши ва иш юритиш соҳаси бўйича фуқаролар ўртасида ўтказиладиган тушунтириш ишлари ва маънавий-маърифий тадбирларда иштирок этиш, уларнинг самарадорлигини ошириш юзасидан таклифлар ишлаб чиқиш;

архив иши соҳаси ходимлари ва улар оилаларининг уй-жой, ижтимоий-маиший, хизмат шарт-шароитларини, уларга малакали тиббий ёрдам кўрсатиш шароитларини, шунингдек, ишдан бўшатишган ёки захирага олинган ходимларни ижтимоий ва касбий мослаштириш бўйича муаммоларни комплекс таҳлил қилиш ҳамда таҳлил якунлари бўйича мазкур шароитларни яхшилаш юзасидан таклифлар киритиш.

9. Жамоатчилик кенгаши ўз зиммасига юклатилган вазифаларга мувофиқ қуйидаги функцияларни бажаради:

архив иши ва иш юритиш соҳаси фаолиятига доир масалалар юзасидан фуқаролар, нодавлат нотижорат ташкилотлари ва фуқаролик жамияти бошқа институтларининг ташаббуслари ҳамда мурожаатларини кўриб чиқишда иштирок этади, шунингдек, уларни кўриб чиқиш натижалари бўйича “Ўзархив” агентлигига тегишли таклифлар киритади;

“Ўзархив” агентлигининг фуқаролар, нодавлат нотижорат ташкилотлари ва фуқаролик жамиятининг бошқа институтлари билан ўзаро ҳамкорлигини таҳлил қилади, шунингдек, ҳамкорликни такомиллаштириш юзасидан таклифлар ишлаб чиқади;

“Ўзархив” агентлигининг фаолиятига тааллуқли унинг норматив-ҳуқуқий ҳужжатлари ва ички қарорларини такомиллаштириш, улардаги мавжуд камчиликларни бартараф этиш бўйича таклифлар ишлаб чиқади, шунингдек, киритилган таклифларни мазкур давлат органи ходимлари ўртасида муҳокама қилишга бағишланган тадбирларни ташкил этишда қатнашади;

давлат дастурлари лойиҳаларини, тадбирлар режаларини ва давлат органи фаолиятига тааллуқли, шу жумладан коррупцияга қарши курашиш тўғрисидаги бошқа ҳужжатларни ишлаб чиқиш юзасидан таклифлар тайёрлайди, қабул қилинган дастурларни амалга оширишда ваколатлари доирасида иштирок этади, бажарилган ишларнинг самарадорлигини таҳлил қилади, шунингдек, йўл қўйилган хато ва камчиликларни бартараф этиш юзасидан таклифлар тайёрлайди;

“Ўзархив” агентлиги ва ҳудудий бошқармаларга нодавлат нотижорат ташкилотлари ва фуқаролик жамиятининг бошқа институтларидан келиб тушган социал ва ижтимоий аҳамиятга молик лойиҳаларни кўриб чиқади;

“Ўзархив” агентлиги ва ходимларининг фуқаролар билан учрашувларини, шунингдек, жисмоний ва юридик шахслар мурожаатларини кўриб чиқиш билан боғлиқ

ишларни ташкил этишда, шу жумладан жойларга бориб ташкил этишда қатнашади, уларнинг амалга оширилиши устидан мониторинг ўтказиши;

“Ўзархив” агентлиги ходимлари ва улар оилаларининг уй-жой, ижтимоий-маиший, хизмат шарт-шароитларини, уларга малакали тиббий ёрдам кўрсатиш шароитларини яхшилашда, шунингдек, ишдан бўшатилган ёки захирага олинган ходимларни ижтимоий ва касбий мослаштириш муаммоларини ҳал этишда кўмаклашади;

ходимлар ва уларнинг оила аъзоларини ижтимоий ва ҳуқуқий ҳимоя қилиш масалалари бўйича давлат органи ходимлари ўртасида кенг тушунтириш ишларини ташкил этади;

“Ўзархив” агентлиги, унинг ҳудудий бошқармаларида ва тасарруфидаги ташкилотларида соғлом ишчанлик муҳитини ривожлантириш, қонунийликни, юксак ҳуқуқий маданият ва ахлоқийликни таъминлаш, ходимларда Ватанга содиқлик руҳини ва қонунларга бўлган ҳурматни кучайтириш, уларни ижтимоий, сиёсий, руҳий ва маънавий-маърифий камол топтириш, шунингдек, мазкур соҳадаги илмий-маърифий ва ўқув адабиётларини такомиллаштириш бўйича таклифлар ишлаб чиқади;

мамлакатда ва хорижда кенг жамоатчиликни соҳа фаолиятини ислоҳ қилиш бўйича амалга оширилаётган тизимли чора-тадбирлар ҳақида мунтазам равишда хабардор қилишни таъминлайди ҳамда мавжуд муаммоларни ҳал қилиш ва камчиликларни бартараф этиш юзасидан таклифлар ишлаб чиқади;

соҳа фаолиятига бағишланган илмий-назарий ва илмий-амалий конференциялар, семинарлар, давра суҳбатларини ташкил этишда иштирок этади;

соҳа фаолиятини оммавий ахборот воситаларида ёритиш бўйича бажарилаётган ишларнинг натижаларини таҳлил қилади, уларнинг самарадорлигини ошириш ва мавжуд камчиликларни бартараф этиш юзасидан таклифлар ишлаб чиқади;

ўзига юклатилган вазифаларни бажаришда нодавлат нотижорат ташкилотлари, оммавий ахборот воситалари, фуқаролик жамиятининг бошқа институтлари ҳамда фуқаролар билан ҳамкорлик қилади.

10. Жамоатчилик кенгаши зиммасига юклатилган вазифалар ва функцияларни бажариш учун:

“Ўзархив” агентлиги, миллий архивлар ва ҳудудий бошқармалар томонидан ташкил этиладиган бўлажак очик ҳайъат мажлислари ва бошқа оммавий тадбирлар тўғрисидаги ахборотни олдиндан олиш ҳамда мазкур тадбирларда иштирок этиш;

жамоатчилик кенгаши ваколатига кирадиган масалалар юзасидан таклифлар киритиш;

давлат архивлари фаолияти самарадорлигини ошириш бўйича таклифлар ва тавсияларни ишлаб чиқиш ҳамда амалга ошириш учун зарур бўлган давлат органининг ахборотлари, статистика ва бошқа материалларини белгиланган тартибда олиш;

“Ўзархив” агентлигининг қонун ижодкорлиги фаолиятида, соҳага оид ишлаб чиқилган норматив-ҳуқуқий ҳужжатлар лойиҳаларининг жамоатчилик ва экспертлар муҳокамасини таъминлашда иштирок этиш;

жамоатчилик кенгаши мажлисларида муҳокама қилинадиган масалаларни ёритиш бўйича оммавий ахборот воситалари билан ҳамкорлик қилиш;

юклатилган вазифаларни бажариш учун конференциялар, форумлар, семинарлар, давра суҳбатлари ва бошқа тадбирларни ташкил этиш ҳуқуқига эга.

Жамоатчилик кенгаши қонун ҳужжатларига мувофиқ бошқа ҳуқуқларга ҳам эга бўлиши мумкин.

11. Жамоатчилик кенгаши ўз фаолиятини амалга оширишда:

жамоатчилик назорати тўғрисидаги қонун ҳужжатлари талабларига риоя қилиши;

соҳа фаолияти билан боғлиқ қонун ҳужжатларида белгиланган чекловларга амал қилиши;

“Ўзархив” агентлиги ва бошқа давлат органлари, уларнинг мансабдор шахсларининг ўз ваколатлари доирасида амалга оширадиган фаолиятига аралашмаслиги, фаолият кўрсатиши учун тўсқинлик қилмаслиги;

фуқароларнинг ор-номуси ва кадр-қимматини таҳқирлашга, уларнинг шахсий ҳаётига аралаштиришга йўл қўймаслиги;

жамоатчилик назоратини амалга ошириш давомида олинган ахборотнинг, агар бундай ахборотни тарқатиш қонун билан чекланган бўлса, махфийлигига риоя қилиши шарт.

Жамоатчилик кенгашининг зиммасида қонун ҳужжатларига мувофиқ бошқа мажбуриятлар ҳам бўлиши мумкин.

### **3-боб. Жамоатчилик кенгашининг таркибини шакллантириш ва ишини ташкил этиш тартиби**

12. Жамоатчилик кенгашининг таркибига унинг раиси, раис ўринбосари-котиби ва аъзолари киради.

13. Жамоатчилик кенгаши аъзолигига, қоида тариқасида, давлат органида намунали хизмат кўрсатган меҳнат фахрийлари, жамоатчилик фаолияти соҳаларида катта амалий тажрибага эга обрў-эътиборли фуқаролар, шунингдек, нодавлат нотижорат ташкилотлари, оммавий ахборот воситалари ва фуқаролик жамиятининг бошқа институтлари вакиллари қабул қилинади.

Жамоатчилик кенгаши аъзоларининг сони чекланмаган.

14. Жамоатчилик кенгашининг таркиби “Ўзархив” агентлиги раҳбарининг буйруғи (қарори) билан ҳар 3 йилда тасдиқланади.

15. Қуйидаги ҳолатларда жамоатчилик кенгашининг раиси, раис ўринбосари-котиби ва аъзолари унинг таркибидан чиқарилиши мумкин:

улар томонидан жамоатчилик кенгаши таркибидан чиқиш тўғрисида ариза берилганда;

жамоатчилик кенгашининг мажлисларида мунтазам равишда иштирок этмаганда, мазкур Низомнинг 11-бандида назарда тутилган мажбуриятларни бажармаганда;

уларга нисбатан чиқарилган суднинг айблов ҳукми қонуний кучга кирганда;

вафот этганда, шунингдек, суднинг қонуний кучга кирган ҳал қилув қарори асосида улар муомалага лаёқатсиз, бедарак йўқолган ёки вафот этган деб топилганда.

16. Жамоатчилик кенгашининг таркиби тўғрисидаги маълумотлар ва унга киритилган ўзгартишлар улар тасдиқланган пайтдан бошлаб 5 кун ичида “Ўзархив” агентлигининг расмий веб-сайтида эълон қилинади.

17. Жамоатчилик кенгашининг раиси:

Жамоатчилик кенгашининг раиси ташкилий йиғилишда овоз бериш йўли билан тасдиқланади.

жамоатчилик кенгашининг фаолиятига умумий раҳбарлик қилади;

жамоатчилик кенгашининг мажлисларини чақиради ва кун тартибини белгилайди;

жамоатчилик кенгашининг мажлисларида раислик қилади;

жамоатчилик кенгашининг иш режасини, мажлиси баённомасини ва бошқа ҳужжатларини тасдиқлайди;

жамоатчилик кенгаши қарорларининг ижросини назорат қилади;

жамоатчилик кенгаши аъзоларининг зиммасига юклатилган вазифаларни бажарилишини мувофиқлаштиради;

“Ўзархив” агентлигининг расмий веб-сайтида ва бошқа ресурсларда жойлаштириладиган жамоатчилик кенгашининг фаолияти тўғрисидаги маълумотлар таркиби бўйича таклифлар киритади ва уни “Ўзархив” агентлиги раҳбари ёки ўринбосари билан келишади;

жамоатчилик кенгаши қарорларини бажариш масалалари юзасидан “Ўзархив” агентлиги раҳбарияти билан ҳамкорлик қилади;

жамоатчилик кенгашининг самарали ишини таъминлаш бўйича бошқа ваколатларни амалга оширади.

18. Жамоатчилик кенгашининг раиси бўлмаган тақдирда, унинг ваколатлари ва мажбуриятларини раис ўринбосари бажаради.

19. Жамоатчилик кенгаши раисининг ўринбосари-котиб:

раис йўқлигида жамоатчилик кенгашининг мажлисларида раислик қилади;

жамоатчилик кенгаши қарорларининг ижросини назорат қилиш бўйича ишларни ташкил этади;

фуқароларни ва юридик шахсларнинг вакиллари қабул қилади, шунингдек, жамоатчилик кенгаши фаолиятига тааллуқли мурожаатларни кўриб чиқиш бўйича ишларни ташкил этади;

жамоатчилик кенгашининг самарали ишларини таъминлаш бўйича бошқа ваколатларни амалга оширади.

жамоатчилик кенгаши фаолиятини услубий, ташкилий-ҳуқуқий ва ташкилий-техник жиҳатдан таъминлаш масалаларини ҳал қилади;

жамоатчилик кенгашининг навбатдаги мажлисига барча зарур материаллар ўз вақтида тайёрланишини таъминлайди, давлат органи ходимларидан зарур ҳужжатлар ва маълумотларни сўраб олади;

кун тартибига мувофиқ жамоатчилик кенгаши мажлислари ўтказилишини ташкил этади;

жамоатчилик кенгаши ўтказиладиган сана, жой ва тақлиф этиладиган шахслар рўйхатини жамоатчилик кенгашининг раиси билан келишади;

жамоатчилик кенгашининг аъзоларини ва тақлиф этилган шахсларни жамоатчилик кенгаши мажлиси ўтказиладиган жой, сана ва вақт ҳақида хабардор қилади;

жамоатчилик кенгаши қарорларининг ижро этилиши устидан мониторинг олиб боради ва унинг натижаларини жамоатчилик кенгаши мажлисида кўриб чиқиш бўйича тақлифлар киритади;

жамоатчилик кенгаши мажлисининг баённомасини расмийлаштиради ва тасдиқланган баённоманинг жамоатчилик кенгаши аъзолари ҳамда бошқа манфаатдор шахсларга жўнатилишини таъминлайди;

жамоатчилик кенгашининг самарали ишлашини таъминлаш бўйича бошқа ваколатларни амалга оширади.

20. Жамоатчилик кенгашининг аъзолари ўз мажлисларида кўриб чиқиладиган масалаларни муҳокама қилиш ва ҳал қилишда ўз ваколатини бошқаларга ўтказиш ҳуқуқига эга эмас.

Жамоатчилик кенгашининг мажлисида иштирок этиш имкони бўлмаган ҳолатларда, унинг аъзоси мажлис кун тартибидаги масалалар бўйича ўз фикрини ёзма шаклда юбориши мумкин. Бунда унинг фикри мажлисда кўриб чиқилади ва овоз беришда ҳисобга олинади.

Жамоатчилик кенгашининг аъзолари:

ўз зиммаларига юклатилган вазифаларни бажариш учун “Ўзархив” агентлиги томонидан ташкил этиладиган Ҳайъат мажлисларида ва бошқа оммавий тадбирларда иштирок этади;

жамоатчилик кенгаши иш режаларининг лойиҳаларини тайёрлайди, уларни жамоатчилик кенгашида кўриб чиқиш учун киритади ва тасдиқланган иш режалари бажарилишини таъминлайди;

соҳа фаолиятининг самарадорлигини ошириш бўйича тақлифлар ва тавсияларни ишлаб чиқишда ҳамда амалга оширишда қатнашади;

соҳа ходимлари, уларнинг оила аъзолари билан учрашувлар ўтказиши ва уларнинг ҳуқуқлари, эркинликлари ҳамда қонуний манфаатларини таъминлаш бўйича таклифларни жамоатчилик кенгашига киритади;

жамоатчилик кенгашининг кун тартибига киритилган масалалар юзасидан таҳлилий материаллар тайёрлайди;

жамоатчилик кенгашининг ваколатига кирадиган масалалар билан боғлиқ муурожаатларни кўриб чиқади ва натижалари бўйича тегишли ҳужжатларни тайёрлайди;

жамоатчилик кенгашининг зиммасига юкланган вазифалар ва функцияларга мувофиқ бошқа ваколатларни амалга оширади.

21. Жамоатчилик кенгаши фаолиятининг асосий масалалари унинг мажлисида кўриб чиқилади. Жамоатчилик кенгашининг мажлиси унинг иш режалари асосида ҳар чоракда камида бир марта чақирилади.

Жамоатчилик кенгашининг раиси жамоатчилик кенгаши аъзоларининг учдан бир қисмининг муурожаати асосида унинг навбатдан ташқари мажлисини чақириши мумкин.

22. Жамоатчилик кенгашининг мажлисларига бошқа давлат органлари, нодавлат нотижорат ташкилотлари ва фуқаролик жамияти институтларининг вакиллари таклиф этилиши мумкин.

23. Жамоатчилик кенгаши мажлиси кун тартибининг лойиҳаси котиб томонидан жамоатчилик кенгаши аъзоларининг таклифлари ва жамоатчилик кенгаши раисининг топшириғи асосида шакллантирилади.

24. Жамоатчилик кенгашининг мажлисини унинг раиси олиб боради. Раис иштирок эта олмаган ҳолатларда, мажлисни унинг ўринбосари-масъул котиб олиб боради.

Жамоатчилик кенгашининг мажлисида “Ўзархив” агентлиги раҳбари, унинг ўринбосарлари ва бошқа ходимлар иштирок этиши мумкин.

25. Жамоатчилик кенгашининг мажлиси, агар унда жамоатчилик кенгаши аъзоларининг камида учдан икки қисми (кворум) иштирок этган тақдирда ваколатли ҳисобланади.

Мажлисни ўтказиш учун кворум шаклланмаган тақдирда, Жамоатчилик кенгашининг янги мажлиси ўтказиладиган сана эълон қилинади.

26. Жамоатчилик кенгашининг қарори мажлисда иштирок этаётган жамоатчилик кенгаши аъзоларининг оддий кўпчилик овози билан қабул қилинади.

27. Жамоатчилик кенгашининг ҳар бир аъзоси қабул қилинаётган қарорлар бўйича ўзининг фикрини ёзма шаклда ифодалашга ҳақли. Унинг фикри жамоатчилик кенгаши мажлисининг баённомасига мажбурий тартибда кўшиб қўйилади.

28. Жамоатчилик кенгашининг мажлисида қабул қилинган қарор баённома билан расмийлаштирилади. Жамоатчилик кенгаши мажлисининг баённомаси котиб томонидан имзоланади, мажлисга раислик қилувчи томонидан тасдиқланади ва уч кун муддатда “Ўзархив” агентлиги, жамоатчилик кенгаши аъзоларига ва манфаатдор шахсларга юборилади.

29. Жамоатчилик кенгашининг қарорини тезлик билан қабул қилиш зарурияти туғилганда, унинг раиси ташаббуси билан қарор жамоатчилик кенгашининг аъзолари билан келишилган ҳолда сўров йўли билан қабул қилиниши мумкин.

Агентлик Жамоатчилик кенгашининг қабул қилган қарорига қўшилмаган ҳолларда, Жамоатчилик кенгашининг қарорини олган кундан бошлаб ўн кундан кечикмай унга асосланган эътирозини ёзма шаклда юборади.

30. Жамоатчилик кенгашининг котиби кенгаши аъзолари кўмагида Жамоатчилик кенгаши қарорлари ижросининг боришини ўрганади ва кўриб чиқади, зарур бўлган ҳолларда, Жамоатчилик кенгашининг раисига тегишли таклифлар киритади.

#### **4-боб. Яқунловчи қоидалар**

31. Жамоатчилик кенгашининг фаолиятини моддий-техник жиҳатдан таъминлаш “Ўзархив” агентлиги томонидан, шунингдек, қонун ҳужжатларида тақиқланмаган бошқа манбалар ҳисобидан амалга оширилади.

32. Жамоатчилик кенгашининг фаолияти унинг низомига ва Ўзбекистон Республикасининг қонун ҳужжатларига мувофиқ эканлиги “Ўзархив” агентлиги раҳбари, ўринбосарлари томонидан назорат қилинади.

33. Жамоатчилик кенгаши ва “Ўзархив” агентлиги ўртасидаги ўзаро келишмовчиликлар қонун ҳужжатларига мувофиқ ички тартибда ҳал этилади.